

KERAJAAN CUBA 'SEMANGAT BARU'

KUALA LUMPUR 11 MAC

KERAJAAN sedang mencuba "semangat baru" di kalangan rakyat, terutama umat Islam, untuk membolehkan mereka menjadi contoh sebagai golongan gagah berani, cekap dan bersih dari semua segi, kuat dan kaya serta tidak menjadi hamba kepada sesiapa, kata Datuk Sri Dr. Mahathir Mohamad hari ini.

"Kita mempunyai negara, pemerintah dan kuasa dan ini harus dipertahankan dengan bekerja bersungguh-sungguh agar masyarakat menjadi kuat, kukuh dan berdisiplin," kata Perdana Menteri.

Beliau menambah bahawa Islam mengajar membuat kebajikan kepada orang lain yang kelak akan membawa kebahagiaan kepada negara dan bangsa.

Datuk Sri Dr. Mahathir telah berucap kepada Jawatankuasa Pusat Musabaqah Membaca Al-Quran peringkat kebangsaan dan antarabangsa di Bilik Gerakan Negara di Jabatan Perdana Menteri hari ini.

Tema musabaqah tahun ini ialah "Disiplin dan Kesungguhan Bekerja Dalam Islam."

Perdana Menteri berkata kerajaan sedang berusaha untuk membina sebuah negara yang penduduknya menjalani kehidupan sehari-hari berpandukan ajaran Islam.

Beliau berpendapat adalah tidak salah membawa ajaran Al-Quran untuk meliputi kehidupan semua penduduk tanpa mengira agama memandangkan ajarannya adalah untuk kebaikan di dunia dan di akhirat.

Datuk Sri Dr. Mahathir yakin semua penduduk yang bukan beragama Islam berminat kepada kebaikan sejajar dengan ajaran Al-Quran.

Beliau menyedari hakikat bahawa ajaran Al-Quran tidak dapat diserapkan sekaligus, tetapi berpendapat aspek penting dalam kitab suci itu patut diserapkan dalam kehidupan semua penduduk tanpa mengira agama mereka.

Perdana Menteri berharap orang Islam khususnya akan mempunyai semangat dan dedikasi terhadap kerja yang berpandukan ajaran Al-Quran supaya segala ilmu dan sikap rajin bekerja itu membawa kejayaan.

"Saya tidak yakin Islam hanya mengajar umatnya beribadat dan membaca Al-Quran tetapi juga mengajar membuat kebajikan kepada orang lain yang kelak akan membawa kebahagiaan kepada negara dan bangsa," tegas beliau.

"Orang Islam di zaman nabi tahu membuat perahu dan tengok Kompas untuk belayar dan kerana merekalah kita hari ini dapat berkumpul untuk bermesyuarat mengenai kegiatan agama Islam dan tidak agama lain.

Datuk Sri Dr. Mahathir menggesa orang Islam jangan meniru cara Barat yang hanya mementingkan diri sendiri dengan melancarkan mogok jika tidak mendapat gaji tanpa memperdulikan kebajikan orang lain.

Beliau menegaskan, "berbuat untuk diri sendiri", dan membelakangkan masyarakat yang diimport dari Barat itu tidak ada tempat dalam ajaran Islam kerana Al-Quran sentiasa mementingkan "disiplin diri" untuk kesejahteraan rakyat dan bangsa.

Katanya, disiplin diri menerusi mengawal nafsu perlu diamalkan kerana tanpanya negara tidak akan stabil dan rakyatnya huru-hara.

Sebelum itu, Pengerusi Jawatankuasa Pusat Musabaqah, Tan Sri Syed Nasir Ismail menekankan perlunya perubahan diadakan dalam musabaqah membaca Al-Quran yang akan memasuki tahun ke-25 bagi peringkat kebangsaan tahun depan dan tahun ke-24 bagi peringkat antarabangsa.

Katanya, pengaruh kegiatan Islam kini telah meluas sehingga menembusi ke negara luar yang bukan Islam sehingga Malaysia mendapat pujian negara Arab sebagai pusat perkembangan Al-Quran dan juara dalam musabaqah membaca ayat suci itu.

Kira-kira 42 buah negara akan menghadiri musabaqah peringkat antarabangsa yang akan diadakan selama lima hari mulai 8 Julai pertandingan peringkat negeri dijadualkan pada pertengahan Jun bergantung kepada keputusan kerajaan-kerajaan negeri.